

Automobilistanan contento cu anuncio di rotonde na Noord

ORANJESTAD – Chauffeurnan ta masha contento cu e hecho cu ta bay construi un rotonde na Noord pa alivia e fluho di trafico na crusada di Caribbean Mercantile Bank y ex-Aruba Bank.

Esaki ta un crusada importante, pero cu conoce hopi pegamento di trafico di un forma structural. E pegamento di trafico ta principalmente den oranan di mainta y merdia dor cu tin tambe dos scol grandi den e bisindario.

Satisfaccion

Automobilistanan cu ta frecuencia e crusada a expresa nan satisfaccion ora a tende e noticia. Jorge Alberto Chica ta un dia nan, el a bisa: 'Ta bon si ta bin cu rotonde, pasobra ora bo bay crusa bo mester para mey ora of 20 minuut pa crusa. E ta bon paso e ta alivia trafico; bo no ta tarda pa bay e caminda cu bo mester bay.'

Sara Marquez a pensa di biah ariba e aspecto di seguridad riba caminda pasobra el a comenta cu 'ta hopi bon

pasobra hopi biah tin hopi auto ta sali y e otro no ta wak y nan ta dal otro. Constantemente tin dalmento di auto na e skina aki.'

Chauffeurnan frustra

Manera menciona, hopi di e chauffeurnan frustra pa e crusada aki ta mayornan cu tin yiunan ta bay scol den e bisindario. Esey ta hustamente e caso di Edson Kelly, kende a expresa su pensamiento di pakico un rotonde ta un bon opcion. 'Si e ta facilitá e fluho di trafico, e ta bon bini.

Akinan sinembargo ta hopi druk principalmente mainta y merdia ora di hiba y busca e muchanan na scol.'

Otro chauffeur tambe a duna su aprobacion na e decision di construi un rotonde na e punto aki. 'Hopi bon paso e ta mas facil. Bo ta djis keda core, bo no mester para y warda. Aki ta pega y cuanto biah tin accident aki. Hopi bon trabou.'

Comienso di 2015

Na comienso di siman, director di Departamento di



Obranan Publico a anuncia e construccion di e rotonde nobo. Ing. Marlon Tromp a splica cu teniendo cuenta

cu e dianan di Carnaval, ta premira cu e construccion lo cuminsa den e prome lunanan di 2015. Un rotonde

tambe ta planea pa otro crusada conoci manera ta esun di Driemasterstraat y Santa Helenastraat na Madiki. □

